

3

20

10

9

8

7

6

5

4

3

2

1

1

2m

3

4

5

6

7

8

9

10

11

12

13

14

15

16

17

18

19

20

21

22

23

24

25

26

27

28

29

30

31

32

33

34

35

36

37

38

39

40

41

柳田文庫

文庫11

A1126

5

徂徠集

丈

自  
九  
八

文庫11  
A1126  
5

征祿集卷之八

物茂卿著

序十一首

叙江若水詩

予誦江翁詩而後知神祖之深仁厚澤入於民者至浹洽也吾博桑文明之運方今如日再中也間嘗竊揚榷詩所繇隆降論其世則寧平之際於斯爲盛其名公鉅卿相與賡歌乎本朝之上所爲潤色鴻業黼芾玉猷者野篁藤常嗣之倫皆渢渢乎治世音哉

則山澤列仙之儒。亦有若民黑人西山隱士輩。其嘯傲呻吟之聲。時時聞乎人間者。蓋庶幾乎東方陶韋之流亞云。雖然當是時。上以取士。下以資仕務爲名。高厚利隨之。是其所尚爲詩之教。在彼不在此焉。是其詩而隱者。抱所由顯者以藏焉。則豈莫有不平鳴于幾微之間邪。是其所尚卽上之所好焉。則長慶之流響。日以卑矣。是以詩之亡也。數百千載。降而之國風也。亦數百千載。蟲蟲智智。莫有乎爾。皆詩之權在上故也。今希世求進者。則輒相謂曰。薄海之內。短髮志裝。曳長劒。躍怒馬者。滔滔皆是。吏以爲師。奉二尺武

斷舍是非君子也。則摛藻如春葩矣。益於殿最哉。有王者焉。有侯伯者焉。有公士大夫者焉。有陪臣士者焉。有民人者焉。族類風別。賤不可以貴。而農賈之子。恒爲農賈也。假使上之人。由詩觀其志。下者登高能賦。雖李杜復生。不可爲大夫也。則今之時。非言詩之時矣。雖然百年昇平。文恬武熙。素封樂業。老身長子。率多暇日。莫有所使之。而下有所好之者。帝之力。于我何有哉。於是錦里夫子者出。而博采之詩皆唐矣。方今君美龍舉於東都。師禮虎視於北陸。林叟歸然於海西。伊鳥聯美於中州。雖其言人人殊。粹折

不同。要之皆聞其風興起者。權在下也。故吾曰。文明之運有往而還。如日再中也。雖然是皆世所謂薦紳先生者。迺猶且或疑於其爲名高者也。吾獨誦江翁詩。而後知有真好之也。翁名兼通。字子徹。其先世有操計倪者術。謂津南四方之中以居之。數頃田種秫者半之。環溉以奠水。汲其清爲酒。冽且美。聲鄉日聞近遠。遂以致千金之富。迺命其鄉及至翁之好詩。是寧有所加厚其利哉。年未強而屬家政其子。取所得贏。益斤買異書。以自娛。尚且歲一來東都。雖眎會計。卒雜處保暨中。儻然也。興至吟。迺琅琅然衝口出。

盆罍皆響。高陽之徒。駭然罷去。是併與其所利忘之矣。雖然。使其有朝夕之虞。廢居之勤。亦安能大展力於其所好哉。故吾以翁名之。其爲詩也。莫有耿介處士之風。迺能种澹其辭。削慘其趣。雋永乎其味之也。莫有游間公子之好。迺能樂其利。安其分。優猶乎其言之也。其調雖未得超中晚而上之。迺能句而順字之者乎。故吾曰。神祖之深仁厚澤。入於民者。烏爾其行也。謁予求詩叙。夫高明炎炎。燕之巢其幕。鬼之所瞰。而爲山林者。弗近焉。區乎僂乎。循牆而走。邦國

之士爲廊廟者賤焉。是非翁之嚮慕而亦莫有帶芥乎胸中以好者在也。且也嚮所稱道數君子者。吾未識其人而能識其詩。雖則或嫌乎籍重以名高者。是亦所爲以吾之好從翁之好者。且足以爲贈邪。

桃源藁序

予業已叙津南江子徹詩。越二年。伏陽貫隆父。又齎其所爲桃源稿者來謁予叙也。訊其所由以名桃源者。迺以伏陽。伏陽故嘗以桃名海內。而隆父則輒自以秦遺民也。夫伏陽者。勝國時豐王所都居處也。夫當豐王之起黔首中。身致霸王之業。鞭撻諸侯。睥睨

九鼎。餘威所震。三韓貢而中國封也。其心誠欲爲始皇之所爲。而世學士大夫論驚其武。號所夷殘。亦以謂較諸嬴氏之暴不啻焉。是其流風餘韻。被及其生平。所觀游宮榭遺墟。故都邑所在地者。宜若或有彼蒹葭蒼蒼。秦聲之烈也。及予受讀隆父詩。以卒業焉。則喟然嘆而曰。何其瀟灑清約。一似隱君子之度哉。又訊其故。其所偕子徹同師事者。世所謂鳥鳴春先生。鳴春先生隱居津伏間。言詩數十年弗輟。自守其學。所造詣又弗衰。吾不知其詩於淵明也如何。而高尚其志。則庶幾焉乎爾。然亭又揖隆父護洲之舍。與

共揚搯漢魏六朝。以及唐王孟韋柳諸家言。則恍然迺言曰。孰謂古昔桃源不在今武陵也邪。蓋謂予漁父黃道真也。嗚呼夫隆父生當豐王時。則今桃源不足以避秦之暴已。獨賴神祖之深仁厚澤。浹膚淪髓乎百年之久者。人樂其業。南雅之聲鬱起者。如予向叙子徹詩所云焉。是其所以避秦者。以時不以地。也是其所爲自詫桃源者。以詩不以人也。則孰謂今武陵曾不如漁父乎。雖然淵明之言曰。其中故不殊外人。則漢魏六朝亦何必疾漁父而後知之乎。是其所不暖姝一先生之言以謁予叙者。惟其有之是以

爲之叙

一刀萬象序

今之工章爾者。宜莫池道雲氏若焉。予獲寓目其所爲一刀萬象者。迺蹶然興以言曰。吁哉之人之爲技。一至此極邪。其體則羲頡籀斯岣嶁石鼓孔甲盤盂。闕里蝌蚪。雲章穗文。揚雄之奇。旁及仙篆玉清天書。蒐古鉤隱。雜然具舉。稽疑訂偽。毫分釐析。與夫隸楷。世所希用。游戲一至時出之也。其象則琮璧圭笏。或墮或觚。鼎卣罍方。布雜佩縷。文繡錯細。入秒芳龍。欵龜紐。天馬解豸。百物神姦。夏禹所鑄。滾爪出目。梓

人雕琢攫爛援簎靡弗肖也法度則圓規方矩衡水直生衰者如弦句者類弧一低一昂皆中權鍾高屏相承小大容受疏密穠澹肉好咸宜顧盼映帶一稟自然縱其變化範我馳驅莫違越也品格則高古雄渾都雅神俊麗者嬌施逸者仙釋或潔冰玉或勁鐵石深遠之致瀟散之趣燁若春華晶乎秋蟾風流欲掬秀色可餐辟諸果位薩埵瓔珞莊嚴種種相好宛然備也其技巧所造詣則偃師之倡輪扁之斲輸蜚木鳶棲猿棘端玉楮奪真而郢斤之成風不啻過也此其所爲海內無兩槩畧具是若夫一刀所運得手

應心而五者羣然從之猶且獨以象稱者將無六書所原惟是物而法巧與格亦惟是物也乎衆美所鍾轉相倍蓰什佰都其總巧歷莫能算猶且命之以萬者將無謙也乎三代邈矣秦漢不多見見亦近誣迺自宋宣和而下子昂吾衍景汝二修以暨乎輓近休承凡夫顧何羅金輩增華推輪加厲積水門於是顓家由是名章璽學求諸六書有如一途而是書猶且以千丈爲主者將無私印厪厪末由發揮特借此以罄其吾駢桑經之妙也乎夫梁主所摹與嗣之山陰之蹟無復遺法今書學家奉以爲律令則安知道雲

氏之業不爲金科玉條於後世焉哉。無兩海內爲厚  
于將來美哉。技也一至此極。予以爲今之工章璽者  
莫道雲氏若焉爲是故。正德改元秋八月望。

消間集序

慧巖上人喜詩。詩稍稍佳。輒錄其佳者。佳而調不佳。  
不錄。顧謂予曰。詩猶吾業耶。吾西方業貴。專詩亦貴。  
專詩而專。其專乎唐耶。專乎唐者調也。求法格。而初  
盛中晚區。而別焉。尚何殊乎。吾三品九輩哉。雖然。能  
外安養徒矣。故階級縱淺。吾甘爲唐耳。是慧巖上人  
之詩也。夫宋黃陳。何嘗不韙勉氣格。顧沾沾乎作理  
語。爲禪家之所宗。其所見迺在上人之下焉。則不怪  
上人之能爲靈徹皎然也。祇靈徹皎然。吾未知其果  
能修西方業者乎否也。修西方業者。則善道作禮讚  
其語雖非詩哉。亦洋洋乎美也。上人其學之耶。吾聞  
之。詩主聲。聲明興西方。則西方業故與詩近耶。後善  
導而數百年。在吾東方。則法然。法然之教。尚愚不尚  
智。其徒多善和歌。上人亦善和歌。和歌之於詩。維其  
庶幾哉。夫詩雖三百篇。亦多成乎愚夫愚婦之手。則  
上人豈得諸此耶。上人曰。西方未往。且作此消間語。  
因爲之叙其消間集也。正德壬辰暢月幾望。

## 廣陵問槎錄序

廣陵問槎錄者。藝文學味君允明與其門人寺鳳翼氏所爲應酬查客者。詩書牘筆語具是允明於東都鳳翼於西都而一繫之廣陵者。所事之國治在是頃味君因岡生謁予一言有以標目之。夫予於世一鴻毛庸何能取二君子之重乎。且味君者今國子先生高第弟子早歲蜚譽應聘大國其文章學術業已經伯樂一顧者是固亾論已雖然予獨愛鳳翼氏之業清綺整贍出瀛入奎寒水青藍駿駿乎未已可謂不易得之才矣。有才若斯何問調之同不方今文明燭運多士炳蔚而求其能洗鵠滌侏阜犖乎衆楚之咻者千百人中無一人也。予經營斯文十有餘年屢獲吾滕縣二子以自慰之。今而覩之子則又愕然异之夫深山大澤實生龍蛇是知廣陵之爲大藩哉。吾聞之廣陵瀕大海其怪異詭觀豈多讓於枚叔七發中者邪。夫潮汐之所廻環波濤之所激盪若其澎湃洶湧。嗚雷噴雨誠奮厥武如振如怒橫暴之極山嶽爲崩上擊下律決勝乃罷者其勇爲然少焉風息寂寥若寤皓魄浮彩青蘋不動灝灝澄練縈素映乎洲鴟汀渚之間則清而如淺揭厲孤疑丈貝斑石粲然

見底細淪若織小漪似縠海松石帆纓悉可翫者。是鳳翼氏之所資歟。母乃遠人修聘所涂由西諸侯之供是役舟楫之戒利涉之險是其所慮耶。以故柔其色孫其言。惟真宰之愁是懼耳。不者以彼其才而張以大之何勇不可賈乎。吾聞之昔有皇靈之女降居蓆汭者善鼓瑟其和象鳳皇之鳴其變中帝軒轅之律呂希音彩票玄感鬼神風雨初歇夜深人靜鬢髣髴乎庶幾一舉之鳳翼氏歸其學諸則和以濟清變以化整寓綺于玄約贍于希以翻飛開天之上翱翔漢魏之際鏘鏘秋秋其調卒可以弗畔矣乎夫然後燁以見味君育英之樂也遂叙

國思靖遺稿序

蓋余自斃華音則稍稍聞崎陽有國先生者其聲藉甚也乃意獨以是特譯士師耳夫崎陽夷夏之交船舶之所來集萬貨瓊奇之湊而我五方之民廢居射利者萃焉爲甲于海內祇其物產異土言語異宜譯士爲政邪譯士之富又爲甲于崎陽夫利之所嚮聲

譽從之。夷焉彈舌是習。沸唇是效。何有乎道藝。華焉明審崆峒。嘶喉齒腭。亦何有乎道藝。苟足以立乎龍斷之上。辯知乎異方。互市嘔啞之音。是謂之業之成。師以此而爲師。弟子以此而爲弟子。若國先生者。亦唯以此而豪舉乎一鄉也。是何足尚哉。已又從其門人岡玉成游。則稍稍得聞其爲人也。嶽寄岑峯。落落穆穆。視利若汚。聞名若驚。自其童卯。足不躡官府者。五十年一日也。若夫吹竽鼓瑟。鬪雞走犬。博踢鞠。其民見以爲樂。輕扞厲禁。恣睢辟倪。內交亡命。蹈海通市。其民見以爲恒。崎陽之俗。較諸青廣。不啻也。鄉

之稱爲敦厚長者。鮮有所不濡濡。而先生獨泊如乎其中焉。先生它無所嗜。嗜酒與山水。崎陽之勝。海環乎山。山環乎邑。一口壺哨。萬溪繡錯。雲日之所映發。畫圖弗如也。先生暇日。則琴酒自隨。留連乎其際。五斗成詩。一石成文。興至焉而曼聲發之。清徵佐之。風雨之和之。以時時依俙乎縹渺之巔。則人或以爲仙邪。先生以是爲娛者。又五十年一日也。余於是乎始識其爲隱君子有道者矣。最後先生卒之明年。釋慧通齋其遺稿來于東都。需余一言以弁諸。其言曰。某識先生之文於國先生之言。國先生易簣之日。焚其

稿稿是以弗備。雖然某等諸弟子。則惜其言之弗傳焉。廣蒐而獲者僅若干篇。獨以識先生之文於國先生之言也。雖微國先生之命。猶命之矣。序非先生不可。余受而卒業。玩其言。考其德行。先生蓋明文衡山之流亞歟。溫以粹。清而不寃。濶濶乎其美也。其詩雖不專唐。其文不攻秦漢。亦足以傳矣。今海內人。嘖嘖號稱大師者。何限。長短互有。不無特至。然要其歸。皆侏離鳥言之屬耳。獨先生之業。乃砥礪之玉哉。豈不傳乎。昔衡山以書掩其德。先生之於譯。亦爾。玩其言。考其德行。何謂之譯士師耳。而鄉人皆以譯識先生。

其門人亦以譯師先生所惜。豈在其弗備乎。夫弇州憲於不識衡山。因序其集。則古今事固有相似者焉。乃先生之識余。而余不識也。是其所以重。而。者。是其所以不敢謝。不敏者爾。正德四年冬十月。

二火辨妄編序

吾國家昌大融朗之化。於今爲盛哉。維昔班鳩氏以前莫得聞已。列朝培植以馴致寧平之際。蓋已彬彬云然。未嘗有能以文事乎。抗衡華夏者焉。迨乎慶元而還。海內熙洽。奎璧騰空。文風所播。縫掖成林。而洛陽王宅。最稱人文之淵藪也。當其時。惺窩羅。

山諸公。世所謂大師者。資已英特。學復闊博。加以乘時而起。爲世木鐸。是其才足以凌厲一方。睥睨中土矣。而尚且一意祖述。罕有掎訣。雖則其德之謙讓。未遑乎。惟時爲爾。自斯之後。愈益炳斐。至於伊維楨。首倡古義。而濂閩之教。士子弗屑。雖然是乃薦紳先生之徒耳。今讀芳恂益二火辨妄編。則李唐以下醫師皆廢矣。夫方技之士。而至斯極也。亦惟時爲爾。不佞茂卿。於是乎喟然嘆。乃興西顧而言曰。弔哉時乎。唐虞二代。聖人用教之邦。而鞠爲胡土。文之與時。闇劣幾平。熄其哀也。若斯其甚矣乎。夫有低必昂。詎乎彼

伸乎此。維楨恂益文之屬也。不過十年。文其將上萃於吾。東方耶。吾又聞恂益它著述。升聞九重藏諸君羣玉之府。芻蕘弗弃。邇言必察。盛德之事。復見今日。夫上有好之。下必有甚焉者。是足以知風之自哉。恂益字慄父。隱於北山。好學君子。醫也。介其友江兼通千里賈幣。問業於予。已卒。其孤玄詢。又不遠千里奉其遺命。問序於予。予素昧醫理。且恂益之意。若謂族夫非非者焉爾乎。則予何言。故予且識其大者。以推本諸吾。東方文明之運云爾。

歸鞍吟草叙

鎮西申君有歸鞍吟草之作。其友人竹春菴千里寄示。謁予一言。夫筑自貝先生而後。渺不稱說詩書者。而申君最辨博哉。蓋其人文武自負。不欲以經生自見。馳騁百氏。凌厲千古。出玄入禪。奇正雲湧。其才洵不可測也。已段使與吾曹猝然相遇廣陵舶中。命觴飛籌。柱塵對壘。宏思豪懷。瞰大海以稱快。高談劇論。應怒濤而爭雄。則弇州之於於大夫不啻也。然此莫得往。彼不能來。匏繫各天。徒想其眉宇。此編焉耳。可不恨恨哉。夫申君豈欲以詩傳。而詩盡申君乎。然予識申君於此。而申君獨以此傳。可謂命矣。所賴者方。

今筑產新立綱紀悉張。耆舊遺者行將試用。則申君何必以詩傳哉。詩果不盡申君也。

惟適園六景叙

惟適園者。肥藩大夫中瀨君之子文山所爲自命其園者也。園有六景。曰堆青嶂。謂金峰也。曰積雪嶺。謂蘓山也。曰棲霞峰。謂溫山也。曰聯華岡。曰漱玉谿。曰度月橋。大夫君之弟幻華上人。與吾藩依子相厚善。乃介依子徵言於余。夫海西之與東關。其相距何啻三千里。則余未能諳夫園爲何狀。而景之所映發。何如也。然園之所爲。命其名者。可得言已。聞大夫君十

三時斃其不共戴天之讎于芥川上。藉是名顯西諸侯卒膺大藩之徵可不謂孝子乎。孝子不匱永錫其類文山之所爲適可得言已。夫大夫君方斃其讎時年僅十二。弱當不勝衣。而其讎者世所謂桀驁丈夫也。以年僅十二。弱不勝衣。而與彼桀驁丈夫者相抗以斃之。方其時。豈復思後之名顯仕榮邪。何況聲色之娛溫飽安佚。以適其四體者乎。亦惟適其心志之所爲適已。今文山之所爲適乎園。余故未能諳其爲何狀也。景之所映發何如也。而顧其所爲自誇者。乃不在峻宇崇牆麗櫟綺館奇卉怪石異禽珍獸之間。

焉獨以蘇溫金峰諸勝遠者一二百里。近者一三十里。與夫岡之花谿之玉橋之月。要皆非園中物。適然來獻笑乎吾。而吾亦適然有娛乎吾。心以是徵言四方是已。則其儉樸寡慾。三千里之外。足以想其人也。母乃大夫君家法邪。雖然。大夫君昔者之適以怒丈山今者之適以娛其撰胡不同也。孟子曰。彼一時也。此一時也。大夫君業已膺大藩之徵。名顯而仕榮。見獲乎其君。交孚乎其僚友。以驩然乎其國人之誦。方是時。大夫君蓋亦有所娛云。父怒斯怒。父娛斯娛。故余觀乎文山之適乎娛。而知大夫君之時乎適已。雖

然大夫君豈能忘其昔者之適不適乎聲色溫飽之娛哉。則宮室玩好之後。文山不是適者。余謂之大夫君家法非邪。乃孝子錫類之懿。信然乎哉。且也文山其猶卒歟。異日大夫君老。而文山承其家也。無事焉。則羔羊之裘。退食委蛇。猶之大夫君今者之適矣。萬一有事焉。則被堅執銳。爲士卒先以敵其君。愾亦何殊乎大夫君昔者之適邪。又聞文山好讀書。善筆翰。留意風騷。彬彬乎質有其文哉。海內諸君子頗有賦詩稱揚其事者。余旣已諾依子之請。乃又有想其人也。遂亦爲歌六章。繫之序焉。平爾。

思彼山中之人兮。跂予日夜以瞻望。瑩乎穴青一點兮。冀以餐爾俾齡長。

右堆青嶂

山有千秋雪。我欲持以贈所親。雪邪雲邪。人云白雲兮。不堪持贈人。

右積雪嶺

日出兮照爛爛。日入兮照爛爛。日出日入兮照爛爛。不然園中人兮。胡以顏色如渥丹。

右棲霞峰

婉婉乎兮聯者岡邪。郁郁乎有花兮聯其芳邪。岡上

花邪長如許。園中人邪樂無疆。

右聯華岡

古人云石可漱乎。乃漱之以玉哉。瓊兮瑰兮。粲粲兮盈其掬哉。

右漱玉溪

寂寂兮園居。誰邪羨者。誰邪來者。度溪橋之逶迤兮。明月之窺我也。

右渡月橋

舊事本紀解序

蓋我東方世世奉神道云。恭稽古昔。六經所載。虞

夏商周聖人所爲道。豈翹我已哉。仲尼曰。政必本諸天。殺以降命。命降于社。之謂殺地。降于山川。之謂興作。降于五祀。之謂制度。是故道也者。先王所爲道也。祀先王。配諸天。後王迺奉天道以行之。爵祿刑賞。降于鬼神。所以一其本也。故仲尼又曰。明乎郊社之禮。禘嘗之義。治國其如示諸掌乎。夫六經雖博。何稱非天。禮必有祭。事皆有祭。惴惴栗栗。唯恐獲罪于鬼神也。聖人以神道設教。豈不較然著明乎哉。迨乎禮樂廢。而性理興焉。曰天無心也。曰鬼神氣也。祭則致我誠焉耳。是其意謂先王我欺也。而我覘其心。夫好知

而不好學。以至於賊夫道。人之自聖。一至于斯乎。不  
佞茂卿生也晚。未聞我東方之道焉。雖然。竊觀諸  
其爲邦也。天祖祖天。政祭祭政。神物之與官物也。無  
別。神乎人乎。民至於今疑之。而民至於今信之。是以  
王百世而未易。所謂藏身之固者。非邪。後世有聖人  
興于中國。則必取諸斯已。杞宋弗徵。孔氏之徒。獨傳  
周禮。而儒者迺謂先王之道是而已矣。亦不深思也。  
虞夏與商。我何知之。雖然。非聖人其孰能與于斯乎。  
我東方之傳其道者。卜部氏。齊部氏。吾道氏。而王子豐聰所志。莫備焉。琴鶴丹侯。取其書解之。剖蠶絲。

析牛毛。其所以言其義者。亦莫詳焉。俾茂卿叙之。俟  
昔者仕憲廟之世。侍從臣獨以好學著稱。則知茂  
卿於細席之上者二十年。亦深知其不以富貴易所  
好也。乃茂卿之未聞其道也。故不能贊一辭于其所  
爲解。而唯言我所嘗學知者。是足以叙已。享保四年  
己亥冬十一月甲斐國臣物部茂卿拜手撰。

木足氏父子詩卷序

余幼時聞之。太孺人云。肥有高麗門。蓋當豐王之  
征三韓。肥之先矣。有加藤氏者。爲冠軍。驍勇功最著。  
高麗人至今猶以怖兒啼曰。鬼將軍來也。兒迺泣而

不啼。其比諸羅刹夜叉噉人類威武所懾伏可知已。及其歸也。以所屠陷城門歸表以爲京觀云。大大孺人猶尚及躬親見之。識其材鉅麗詭異者狀。又旁聞父老長年者所覩記鬼將軍戰時它遺佚事。多世所不傳者。初余之內姊嫁肥士人水間氏之子。太孺人以其爲外孫女。絕鍾愛之。携以往。觀其所以事舅姑若君子何如也。因留三年。迺歸。歸則時時顧余輩襁褓中。語鬼將軍事。娓娓乎弗已。以相慰藉。其將睡時。每夜率以爲常。距于今四五十年。言猶在耳。弗忘也。其後內弟僧香洲西游歸。迺謂彼中人士。近多彬彬焉。余猶旦喟然疑之。及於五六年來。與數墨二君相識。皆湛淫墳籍。翔泳南雅。其所著述。頗翩翩有致也。余始駭然異之。越客歲。文學水足君者。迺介數君千里辱書問請。余言弁其詩卷。披之則携其兒郎邀韓使浪華館中。與相酬和者也。對壘文苑。旗鼓相當。賈勇爭勝。矯不肯下。余於是乎喟然嘆息久之。烏乎肥人之於韓。昔以武爭。今則文競。豈非世治亂之效邪。夫肥自鬼將軍以醜威振于海表。而流風餘韵。被於邦俗。以余之所素聞。武藝相雄長。稱大師者何限。今則否。昇平百年。加以憲廟右文之治。烝烝乎覃

遐方才子輩出。不讓中土。昔之爭也。武夫今之爭也。君子。曾謂斯卷不若高麗門乎。文學之選。譽重一邦。固無俟余論。而汗血之駒。駿駿日上。亦何以能定其所底止也。獨以太大孺人之言。猶在耳。而惟夫肥俗之所以丕變者。書以爲叙。

徂徠集卷之八

序二十一首

官刻六諭衍義敘

是歲冬。有司奉 教梓行六諭衍義迺以茂卿旁嫺象胥之學也。政府行本府特 召俾譯進。又俾作敘敘其由。伏以昔在唐虞時。契敷五教。周司徒鄉六行八刑。明德親民。養老敘齒之禮。莫不以教化爲先者。漢唐而還。以及明清。孝悌力田木鐸老人之設。導愚

化蚩淳倫睦俗誠爲百王率由之常典也其書蓋放古諸誥之遺意以俚言行之不假丹贋無事脩辭務卑之而勿甚高論施諸農畯紅女屠酤之徒辟如耳提而面命之愜于聽沃于心順乎莫有夭阏雍閼之患務鬯事情厭而飫之委曲開說弗喻弗措假使嚚頑至聾癡之人聽之亦必能帖服其心志不敢爲惡可謂閭里之善教也獨以坊刻諸書皆華舶所齎來崎港賈人所貿易人人得購學士大夫又擇其可者私自讎校授梓布于寰區固無煩官處分而斯乃琉球國所致藏諸天祿石渠之上無復兼本流落人

間者或聞其名希一觀未由獲之故有司特奉行其事焉我國家所以崇教尚學啓迪斯民其用心豈不至深厚也乎海內受讀者其仰體盛德之意其君子務端已率物先風化期於刑措其小人務孝慈成俗安分樂業迨於罪戾全其首領長其子孫優游乎昇平之澤冀以弗負國家仁民之心哉陪臣茂卿授簡謹敍所聞於政府者如此享保六年辛丑十月十一日甲斐國臣物茂卿拜手稽首奉教敬撰

紫微字樣敍

初余之釋褐吾藩也廣澤滕公謹業已以先進擢顯列從負弩卒歲時校武儼然爲爪牙藩邸中焉然尚且以舊所媚習在文學時復與余輩橫經鳴玉出入乎闇闔得近日月末光沐上恩拜文綺白金之賜以比侍從清切之臣者數載矣則每倚席以退相共聯翩官道上顧語弗已或奉上旨督諸中貴人學若來視邸史曹事亦皆接武簉翅告以前政義等同寮焉則曹事稍間過飲拒臂相得驩也蓋公謹爲人魁岸甚口善譚纏繩半若霏鋸屑出文入武沈洋百氏旁綜衆藝人所歆艷性不甚嗜酒酒間或及一義

節事則輒慷慨激烈怒髮上衝冠目光炯炯乎亦不自覺性爲然也亡何遂中口語以去及憲廟賓天先侯請告余亦出邸養病護洲上以及徙今牛門以病故不能尋舊驩脩交其所知識諸君子矣公謹亦困風塵不數數相遇然每過未嘗不道故相泣彼時也一日袖其所著紫微字樣者相視且言曰我老矣凡百耆好漸以廢落惟老書乃甚往時然家貧技雖癢安所得好帛墨以耗磨之哉以故王侯每徵亦不甚拒非彼焉則高麗繭易水墨難遇也童生蟻慕頗惡其煩然以彼其所求值此其所耆亦不甚厭也

近者爲一年少所聊蕭之。指擿世所稱內閣字府者。遂成一冊。亦雞肋哉。爲之如何。余受而卒業。則蹶然興而曰。吾東方文章之盛。千百年唯有今日耳。顧書亦然矣哉。解拘繩。破盲瞖。微君乎。海內誰歸也。夫羿善授人。殼率而不能俾鍇相承者。非邪。降格就卑。庸何傷哉。公謹听然笑。因趣梓之。迺詳敘余所以與公謹驩知識其爲人。并其首以俾海內覽者。知區區非公謹本色也。

七經孟子考文敘

先王之道凝仲尼以傳萬世。知命之言信哉。故其言

曰。文王既歿。文不在斯乎。苟非至德。其孰能與于斯乎。然又曰。逝者如斯夫。不舍晝夜。又曰。朝聞道。夕死可矣。言古之不可復反。而道之易失也。不爾。以仲尼之聖。而周流諸夏。訪求弗已。歷三十年之久。自衛反魯。而後雅頌各得其所。若是其艱者。獨何也。後之君子。不體聖人之心。乃徇其眇忽荒昧之說。而信而好古之義。幾乎熄焉。豈不鑿哉。秦漢之後。漢建學官。逸文古籍。往往乎出。當其時。經顥門人殊義。亦頗紛然。莫知所適從。而原其所自。蓋皆七十子之徒所傳。迨乎馬鄭諸家。蒐而鳩之。考覈緝綴之勤。其功廣哉。亦

可謂知之次也已。故千載之後，欲求聖人之道者，終不能廢漢儒而它援爲是故也。宋而後人喜新說，而古註疏束之高閣，鮮有能讀焉者。是阿其所好，沿流忘源，况人非聖人，何必盡善，而乃執一以廢百？亦弗思之甚也。今閱世所行古註疏板刊文滅，不可得而讀之。夫以諸夏聖人之邦，世奉教之弗衰，學士之衆何限，而乃致斯泯泯者，豈非人不體仲尼之心，信而好古之義熄焉邪？上毛之野，有野參議遺址，乃數百年弦誦之地焉。紀人神生，夙有好古癖，偕州人根遜志者往探之。獲宋本五經正義文具，如弇州之言，而

較之明諸本，其所缺失皆有之。紕繆悉得，又獲七經孟子古本及論語皇疏校之。其經註頗有異同，而古時跋署可徵，亦唐以前王段吉備諸氏所齋來存于此而亡于彼也。生喜如拱璧，遂留二年，罄其藏以歸。因積勸得疾，紀藩羽林將公聞而俾錄上其所校生疾更甚，黽勉從事呻吟交發，不能辨其爲何聲。顛沛以之，期年而成，疾亦尋差。凡三十有三卷，題曰七經孟子考文。問序于茂卿，茂卿旣悲仲尼之心，而嘉生之善體其心，誓死弗輟。卒能成功斯文也。又幸諸夏之所逸，而獨歸然乎？吾邦靈祇所衛，千載若新，以

授之生而寵錫海內也。嗚呼。國家文明之化與有  
光哉。爲之敘生名鼎字君彝。先是自紀齋糧跋涉千  
里來吾塾中。道旣通以文學穀于將公幕云。

### 皇和通歷序

孟子曰。天之高也。星辰之遠也。苟求其故。千歲之日。  
至可坐而致也。夫學者莫不苦思焦心以求其至焉。  
者已。苟有所得執之不化。以概一切。亦何固也。其究  
必至耀已。所見以廢。故然。故者昔人旣已布諸方案。  
何可廢也。彼世儒自幼習讀程朱所故訓。日熟之不  
已。以爲是其至焉者。然昔人雖聖乎。烏能先知彼所  
爲乎。故守宋儒者不能讀唐宋以前書以通之。是其  
所自夸爲知者。顧不愚哉。亦是類耳。予所知平安平  
元珪乃異於是。元珪者。一藝之士也。善歷。蓋學授時  
而精焉者。然亦惡固也。盡取史所志漢以來數十家  
歷。推而步之。其於故無所不盡心焉耳矣。嘗謂前授  
時而有統天守敬之所爲。創彼先得之。世之執一者  
獨歸美。授時寃哉。今貞享歷行于世。而其法藏日官。  
元珪乃自思而得之。後獲其書驗之。皆合。亦能言其  
紕繆。可不謂精乎。近者作《皇和通歷問序》于予。予  
閱之。吾所用元嘉儀鳳大衍。宣明人能言之。至於其

得五紀之年則自元珪發之。元嘉之前滻諸人皇之初乃立三法以括之。又作爲諸捷法附末元珪之於歷可謂左右逢其原者已。亦晰夫故之效也。孟子之所稱十歲之後方今之世其惟元珪與元珪又有巧思嘗創其心變古渾儀設機旋輪一旋一日須臾而三百五十四旋一歲之日躔月離黃赤道之所交弦晦盈食之狀按日可驗一十四節有鐘自鳴人莫不噴噴敬焉異亦其緒餘云元珪隱銀官而微其不以此而自廢能通一藝卓然名其家嗚呼昇平之世人皆知自重者若斯夫。

郡司火技敘

海內言兵者亡慮數十家要之不出於甲越二氏所爲法它皆小有所緣飾易其名以求售者已何足道哉夫兵之毒莫火若而火之技有異端焉一氏所爲陳前火與弧而後其戈矛衷以旌旗舍馬而徒彼我皆然海內至于今宗之未有外乎此以爲陳者也然當一氏之世塵塵乎有鳥銃耳鳥銃百步而止火之毒未弘故其爲陳若是其弊矣哉至于豐王時則有發熿諸大礮屬出焉其遠可及十里火力所至假使二氏復出豈能爲其陳於前邪然其物重不可以移。

其毒暴不可以近人之力。莫之能執發輒後郤。莫之能制人物爲蠶。是不可以置于陳。故世之爲陳。至于今猶故耳。數十年來人迺稍稍媚之熟或至有一人之力能發百兩者。然亦千百人一人矣。豈足以爲陳哉。予嘗讀戚元敬書。則佛狼機虎蹠諸礮車而列之。進退利便。環則象城。儻忽變化。步騎翼之。毒是以神。以此爲陳。而後二氏之法可廢矣。祇山東人鮮有能識焉者。及因縣孝孺以見長人郡司君者。迺始得與聞其說。於是乎撫掌大言。天下亡敵也。蓋佛狼機諸礮。其邦固有之。君復以其意造礮牀。初備人有旋風。

妙用諸牀皆能畜弗郤。然過十兩則敗。君之牀雖百兩。弗復敗。牀凡三曾。下設機轉之。其轄如毛。左右前後。唯意所鄉。蓋礮之爲力。有畜輒激。激斯郤。故人莫如之何。已。君迺以弗畜畜之。而後畜斯弗郤。洵天下之至巧也。君又曰。火之毒在硝。硝之巧在數。丸有輕重。箭有短長。劑二者而制之度。短究千三寸九分。遠究于十里。肥人所傳。其數在三極與大衍焉。是謂衍極。復施諸火箭。彼圓此兌。是以其取數不齊。而會于一。我所剏也。朝鮮諸術先世所傳也。併錄以遺後人。子盍敘。夫人之爲技。皆以見其勇也。君迺制其器。定

其數用之陳而使人各爲勇君之爲技可謂進於技也已。予旣已廢一氏之法而有取於君之技者以之君名信之。其先世有爲郡司者故以郡司氏見爲長馬監云。享保九年甲辰春正月。

南郭初稿序

平安服子遷從予游數歲而業成。成則非予不佞所敢當也。近者其門人請梓其南郭初稿者。子遷則謀予。予曰曷不可。俾誦其詩。則泱泱乎羨哉盛也。體無所不具。材無所不博。蓋刻意滄溟而豈第過之。乃渢漁乎中土之音也。務裁纖巧。抑輕俊。以就溫厚和平。

之旨。是足以風也。它日使子遷木鐸一方。詩之教庶幾被之一世哉。文亦然。然其慧而才敏也。故其巧與俊終或不能全闕之時出之。子遷乃無所不有已。予嘗讀經國懷風諸編。喟然歎曰。有是哉。何其寥寥也。千歲而上。唯晁衡。藤萬里。野箛及吾家納言能唐。亦惟僅僅晨星。是曷稱日出之邦哉。有樂府。曷有所謂郊祀。鐃歌橫吹。三調相和者乎。古詩非其古詩。而歌行五七言近體。倍蓰之什伯之。其精粗庳高。亦倍蓰之什伯之。至於文。則彼特四六之雄耳。其出左入馬。吐莊哈騷下及韓柳之長。皆振古之所無也。夫千歲。

而下雖無文章可也。千歲之上亦惟僅僅如彼。則此集之出。豈不爭先日出之邦哉。彼局於世者。瞻忽古唐局於地者。聽瑩季王。寧知有子遷之業乎。是豈待他日既足以風一世也。門人之請曷不可。嗚呼予老矣。將不及見其二稿三稿者出。故且序以寓爲宰之意云。享保乙巳十月望。

賀秦君五十序

姑丈川勝藤右衛門君者。秦氏也。是歲甲申。寶永改元。行年五十。秋七月二十有四日。正其懸弧之辰也。內姪物部茂卿稱觴而祝曰。自古上壽者。必以華封三言爲稱首。亡論其尊卑匪媿。秦君食祿七百石。職在執戟。方今世承昇平。四方無虞。士之生斯時。樊曹野戰之功既不可獲。許史剖符之幸亦匪所欲。陞職呂資增秩以考。故雖其巧宦者。亦大氏不能出其資與考之外。而坎軻沈滯。逞逞爲然。且國家之養士。本以取守禦之用。而擇其才諧者。分理庶務。若使皆遷職。則國孰與守。不遷則秩不得增。而富不可祈也。又秦君無子。養同姓之兒爲嗣。以體祖宗之心。則秦之指若干。寔爲多男子。而多男子不可祈也。亡已其壽乎。祇控弦之俗。上勇媿死。習以成性。國于以彊。縱使

上聖秉化。必俟再變。然後可以至於道。故因民之治。就以爲教。榮辱貴賤。由此而分。則壽亦不可祈也。與是何以爲祝邪。以夫炎農邁德。其裔以昌。唐虞之世。有若四嶽。文武興周。有若子牙。以迨乎呂政握錄。皇帝其王。守令其侯。曰朕曰制。烈于萬世而不渝。然其後不血食于中國。而綿綿乎吾東方者。秦君其人也。稽諸譜牒。皇政之孫曰孝武王。王生竹區宋孫。生法成。成生功滿。寔始歸化。滿生融通。或曰弓月。是生普洞。又曰浦東。其子酒酒生意美。美生忍。忍生丹照。照生河。河生國勝。勝生川勝。是曰廣隆。磯城島朝。

大連其弟川滿川。武滿武之後。或爲禁兵。或爲伶官。所謂武文。及今散樂師有稱其胄者也。唯川勝食封丹陽。世爲爪牙。暨足利氏之末世。有備後守繼氏。其子主水正秀氏。娶明智光秀女。生丹波守廣繼。廣繼之子主水廣明。乃吾秦君之父也。始秀氏在福智山。食賦十八萬石。寔爲列藩。勝國之時。慮邑大見忌。而詭稱二年。遂爲脅削云。烏虜秦君既能以祖宗之心爲心。則農岳已降。精神與吾流通。亡閭是由身而上千百世。一人也。子孫亦能以秦君之心爲心。則由身而下。千百世。一人也。繼志述業。貽厥孫謀。是亦可以

爲壽與而富與多男子。在其中矣。秦君听然而笑。齊  
觴者二興而請曰。吁吾乃得吾壽矣。子其亦爲吾書  
其所以爲壽者。傳之吾子孫庶乎吾壽之不唯能脩  
上而亦能不短下也。遂書以爲獻。

賀香國禪師六十敘

不佞茂卿之於香國禪師。曩者從友人田省吾所。稍  
稍獲覩其所論著敘記偈頌及它雜事。心已慕說之  
也。嗣乃偕崎人岡玉成一趨品川精舍。實始接其半  
采聆其譚論。則與共揚扢上下數千載氣運。所以醇  
澆文章。由是樸靡材習倍篤。心面人殊代載辭遷。音  
因土限古今不相及。而和弗華是若者。亹亹乎言之  
驩然相眎。莫逆乎懷也。爾後雖赤牘一二往還。乎余  
護洲之舍。余故困病與嬾。不能整蹵十數里路。以繼  
見乎禪師。而禪師亦不忍塵土其袈裟。以訪予市樓  
中。徒爾神交心照。寥寥冥冥之外。三數年于茲矣。雖  
然。余每飯其心。未嘗不在鉅鹿之下。又時時聞禪師  
口。余事於朝紳間者。不啻如一日之雅也。越正德改  
元冬十月哉。生明善畫石生者。齋禪師書至。則謂是  
歲禪師甫開六袞。而初五適當其誕彌之辰。徵余一  
言。以俾稱壽堂下者。識支公方外之交。今日別有一

許詢云爾。夫自南高二公操華音以鼓吹其道而緇林之嗣遺徽繩餘響。高若靈皎。庳若九僧。駢然奏其技於左右者何限。復以禪師聲藉甚乎。東都而東都人文所藪。澤家隋侯。人靈蛇踵。篋籠麝至。燁煌煥映其前者又何限。是何所乏乎觀美而不佞是問且也。禪師師乎禪。禪余所不解。余獨識禪師文。文自禪師土苴。辟諸美人美歌。耳目雙賞。瞽者迺昧其麗曼。但識縹渺之音。則在瞽者不可罪其無眸子。雖美。人亦何嗔其從旁擊節哉。是禪師所以不余遺者爾。更上而論之。聖人至孔子。肇文肇儒。六籍不朽。木鐸

徇行。既暨平諸子百家。分鑣背馳。皆循其轍。卽莊周。拘儒滑稽。後衛道者。不得弁髦其丈。而瞿曇出世。獨踞三界之尊。猶且能儒其號。以文中自王。楞嚴維摩。迺爲藝苑逸品。則自非農賈工虞。凡諸不耕而食。不蠶而衣。四體不勤。五穀不分。口有誦。手有畫者。無適非。儒孰業不文。而况禪師之所長乎。是又余所以無封畛乎方內外者爾。故今者之役。請以文壽之。蓋嘗試論禪師所爲文者。邈焉眇覩。無始而秦漢以降。班馬韓柳八家七子。氣格風調。色澤神理。纏乎莫不具也。超焉玄覽無外。而宇宙以內。風雲變態。山川融結。人

情物狀動植靈頑。云爲擾擾。宛乎莫不畢肖也。要之法不必拘。辭不期工。一取諸邈焉超焉之中。以出之唇脣也。宮商鏗如。以落之毫素也。丹青炳如。古人所謂風木相遇。猝然爲文者。唯禪師爲近之。是豈與世閉門覓句。仰梁著書。瘦爪嘔肝。拮据皆痛者。同年而論哉。大氏文士苦思。入心者滿寸。繇是往往夭其天年。而禪師則不然。何者。遊戲所至。咄嗟便辭。手無待思。意隨筆至。萬物爲其使役。玩群象於股掌。以此爲文。何文不娛。以此爲壽。何壽不長。不則安有齡周甲子。而聰明矍鑠如禪師者乎。方今國家緝熙奎璧。蓋以終今日之誼也。

壽下館侯五十之初度序

是歲正德乙未。下館侯行年五十矣。覽揆之辰。實爲十二月辛丑。則自友邦六七君侯。或姻好。或否。暨舊所與共事。先朝侍從之臣。暫御大夫。出而奉朝請。

者。以至於其它貴介公子薦紳先生之徒。諸所與侯游處相厚善者。咸莫不各篚其篚脩其辭。以言其所爲。欲祝侯之意。而致諸下執事爲之壽也。是日蓋滿堂云。則有客遠自金華之陰來。見物子牛門之廬者。既見再拜以請曰。某者塞以外鄙人也。昔嘗仕于上國。有獲戾於其君焉。乃以不能自靖乎位也。承浙以去。去之日。舊君俾其士師大索國中弗獲也。則將以窮諸海內。而錮某之所往焉。當是時。某殆乎不能追其死矣。而唯侯之一言。乃得以紓舊君之怒。俾某不死者。豈非侯之錫乎。然侯未嘗有一日驩于某也。而

直道以言之。是豈有德心哉。則天地之德矣。某愚蠢。豈敢一日能忘天地之德邪。某昔在上國。亦嘗習聞於侯齒與其嶽降之日。則奮然思欲效一言之祝于侯。以及今日之事。而不可遏也。以故不遠千里。裹糧南來。乃路過于常山之麓。侯之封國也。則見一丈人植杖其道傍。與少者相顧語焉。丈人曰。天邪。父母邪。我侯之封於斯邦也。十有餘年于茲。而民不死乎刑矣。以我燥髮所睹。記先祖考所傳道者。未有侯之盛也。少者曰。烏乎。胡以能長我侯之齡。以終我世乎哉。胡以能俾我侯有子善肖之。以終我子孫之世乎哉。

胡以能恢大我侯之封。以俾我親戚兄弟在竟外者皆霑其德乎哉。某怪焉語以今日之事。則不識也。曰侯家典禮。何有乎我儕小人。小人每飯焉。則其心未嘗不在我侯也。是已。某於是幡然以爲是。雖古之善禱。莫之尚已。何必稱觴薦其辭侯之前。而後爲爲祝也。某居嘗所爲祝乎侯者。亦乃天保不啻哉。朝焉則欲其如日之升矣。莫焉則欲其如月之恒矣。瞻彼南山焉。則欲其壽之不騫不崩矣。瞻彼川流焉。則欲其福祿方至。以莫不增矣。于岡焉乎。如岡矣。于阜焉乎。如阜矣。于丘陵焉乎。如丘陵矣。于松柏之茂焉乎。則

亦欲其如莫或不承矣。是可以已邪。然未有以辯也。故又枉道子之廬。而敢子之教。是請物子聞之。喟然嘆以興曰。侯之德。其遠矣哉。遠者壽之徵也。夫有識焉。有不識焉。莫不皆頌侯之德焉。有至焉。有不至焉。莫不皆欲侯之壽焉。其斯之謂遠也邪。夫今日之事。堂上之辭。亦莫不皆頌侯之德已。其友邦之君。則能言侯之善隣乎。姻好稱仁否者義乎。其舊所與共事者。則侍從之臣。稱忠乎。贊御大夫稱敬乎。出而奉朝請者。亦能言其同寅協共之懿乎。貴介公子以禮。薦紳先生以道藝。諸所與侯游處相厚善者。亦各莫不

皆致其所爲欲祝侯之辭已。然是皆侯之所素識焉而分當至焉者。其辭雖人人殊要之。豈皆出於華封天保之上哉。唯客與丈人之言。而後識侯之德遠矣哉。侯之壽。豈有窮已乎。夫頌其德而至於天地焉。悠久之徵。非邪。不佞茂卿。侯之外臣也。迺蒙弗鄙。延而相見一堂之上。歲時則五馬之貴。儼然以辱臨乎敝廬焉。則又以其同齒。而其雲漢之章。亦嘗貴及其丘園焉。則欲一言以頌侯德。祝侯壽。而不可得也。而今而後。乃始得其辭哉。夫有識焉。有不識焉。有至焉。有不至焉。分定故也。爾旋。吾其代爾而稱爾。祝于侯之不至焉。

前哉。則常山丈人亦與有榮哉。客大喜。再拜而去。遂錄其言。以致諸下執事。嗚呼。侯之德遠矣哉。其不識焉。而不至焉者。亦何限。侯之壽。果乎其莫有窮已也。

同齋越先生八十壽序

同齋先生。席累世膾仕之資。加以侍從之勞。業已儼然顯爲諸大醫先生祭酒者。數十年矣。是歲享保之辛丑。年寔八十。而正月十有九日丁巳。爲其皇覽之辰也。則自親戚知友。暨乎門生義故。虧然聚。而謀所以壽先生焉。迺君瑞徵余文。余不佞。以諸侯之臣。抱病乎跔伏北門之郊。而甕牖簷戶之與鄰。唯丘里之

言是媚則烏能脩辭樽俎之上以中先生之驩雖然  
先生者先子之執也而余又辱君瑞從游則又烏能  
辭惟夫國家融朗敦龐之化洋洋乎四海旁皇乎  
天地玉燭所燭和風翔而甘雨施者殆踰百年之久  
而民之霑濡沐浴其德也上焉文恬武熙莫所事事  
下焉鼓腹含哺于我何有哉是壽繇也時或燠寒之  
少忒而淫厲札瘥之閼其化則有諸大醫先生操其  
刀圭齊以湯液解癉起璧生死肉骨以俾斯民克烝  
烝於壽以輔皇上之仁於下焉則古人等其功烈  
亞諸良將之治者豈虛語哉是亦壽繇也然其或爲

名高所使或爲其糈而奔趨營求之弗遑邇篠戚施  
無所不至以滑其和以夭其天年者世豈眇哉亦非  
天嗇其報也迺急其報於橐之過也惟先生不然先  
生之先人起家勝國之際其所以扶創夷於兵革之  
餘納諸曠蕩之澤蓋與國家更始焉遂守其鴻術  
仁與世遭益茂昌其業以至先生之身亦踰百年之  
久是以望高家富迥出儕輩是豈世之食其伎者倫  
哉余又聞之先子之言曰先生者君子人也亦惟种  
澹爲性孝友爲植樂善博施忠信以行之不棄人之  
急不利人之阨寧玷其名孰若濟物寧喪其穫孰若

範我又蚤聞至人之道。蟬蛻塵穢之表。金心不滓。皭若冰雪。故無赫赫之譽。而有恂恂之行者。惟先生爲爾。是天之所以貺於先生。歛數世之仁厚。集諸其身。而先生迺薄享之。則先生之壽固其所哉。方今君瑞績學弗怠。克家弗殆。行將廓培其仁。以濟奕世之美。夫之所以孝事先生而養其志。豈徒涓滴甘旨溫清與色已哉。則先生其無憂乎。惟人憂斯損壽。有子若斯。將又何憂。先生之壽殆未有艾也。八十曰耄。先生耄而未耄。由耄而耋。以至期頤。先生之壽豈有艾哉。君瑞於是乎興再拜言曰。珪雖不敏。願服膺于之言。

以長事家君焉。庶以免其罪戾邪。不翅家君之幸也。物子亦再拜曰。果爾。先生之壽愈益。莫有艾已。不佞幸甚。則賦南山有臺之章。以爲先生壽。

復軒板君六十序

不佞茂卿。十四五時。從先君子。東游于房。總總之南。蓋有帆丘之山云。迺板倉氏之虛也。荒廢百年。城復于隍。然其顚猶有壘壁臺池之遺。隱隱可睹已。左控高原。右帶瀆水。東嚮以踞。屬鄉二十有四。可俯窺焉。外之九十九里之沙。大海銜之。遙碧彎彎。然風雨或晦。滔天之濤。若蹴林杪以來者焉。時時陟其顚。以眺

日月之所繇出雲物之所儻忽變眩風颯然以來。其下彷彿乎若有蓬萊靈仙之宅神之與往冀之不可得也。惘惘然以下下則或與鄉父老相語頗有能道勝國時事者。偉其戰績歷歷指言之。若在目也。悵然以想然當其時寧何能識其裔孫爲誰某今在何處邪。暨乎十許年前與武文安相識而得見其獄尊復軒君者。迺友庵先生之外孫也。友庵先生者則吾姑丈李庵先生之叔父也。語次所及爲之惋然。今年春復軒君儼然辱臨尋其舊盟。又携其仲子美仲爲行束脩以見之。美仲年甫十六聰慧善詩文才思日

上汗血駒也亦惟復軒君好讀書六十年如一日。烝烝之化有以被之。講業之餘時聞美仲之敘其先世也迺始識帆丘之後是其人矣。則爲之恍然居二術六月九日爲復軒君覽揆之辰也。美仲來而謀所以爲之壽侑其觴者物子曰吾豈敢也吾聞之昔者豐王之東征也偏師以徇房總一日而下數十城帆丘與焉數十城之裔散爲庶人其僅得以仕于諸侯之邦而列君子林者可僂指數猶以爲幸哉。迺尊公委質親藩值風雲之會爲代來臣當其世而獲奮然致身本朝之上三增秩爲今官何榮也在公之暇迺

好讀書六十年如一日弗倦何健也子昆季二人或武或文咸奉教幹其蠱何樂也是其福祿之來。滚滚者久矣。值天地之不好德人日尋干戈三百餘年。君之先城帆丘者。豈非其時乎。于其時雖有仁人君子。不能躬享之福。而必貽諸後世。惟我神祖降德于下。民離其塗炭。列朝累洽。仁霈乎無外。而天地不愛福。故人之多壽。宜莫今日若矣。以尊公而值今之時。雖無先世之積。以發必將裕諸其躬也。是豈容予言。雖然尊公承帆丘之後。而弗能躬目其勝也。予躬目

其勝而弗獲其人。歷數十年而弗能忘于懷。今獲之尊公者。是宜若不無予言。况有家世之舊也。况子之命之也。迺作詩五章。授之觴者。

帆丘嵩嵩以瞰大海。大海無涯福祿何已。君子以若一章。維海出風。其來自東。草木美好。福祿攸造。君子其老。二章。維海出雲。降雨芬芬。百穀咸膏。福祿浩浩。君子其耄。三章。維海之谷。吐日歛月。經天無極。福祿無缺。君子其耋。四章。維海之洲。列仙攸游。詣我期頤。靈草歲蕤。君子味之。五章。

縣先生八十序

是歲次公復從侯述職來于東也。越九月將還乃請予曰。家大人齡已及耄矣。孝孺貧無以爲壽。請先生之言。以爲家大人驩。予惟始次公之從予游也。縣先生乃一造予以相見。距于今殆且二十有餘年矣。聞今次公學大孚于上下。日橫經君大夫所。是弗遑給而國中諸子弟來受業者。屢恒盈戶。值其亡不官還以族。則縣先生爲之口授句逗曰。吾其代孝孺勞哉。以次公之從侯述職東西無虛歲。而縣氏之徒。非它博士淹國者獨盛以此。憶縣先生年長於予二十許。今旣八十邪。何壯也。予則僅耆備甚。一切謝生徒。以

絕物貽誚。又何異也。且今教者。皆不冇躬親授句逗。下惟深居。罕見其面。乃以弟子久次而使之代。是常耳。今學者訓故貿亂章句。弗以職此之由。夫臯比之上。高譚眇論。旁若無人。望之尊倨。乃孰能屑屑然日與群童子偕。逐行尋墨。顙昂其首。吾伊聲承其脰。以囁嚅一章數十過。尚且諄諄乎弗已也。縣先生久已儼然爲大邦師氏。乃以次公從予游也。居常推之以爲弗及。卑以自牧。謙讓以之。父子之際。雖天性放而弗勸。無遺細物。其諸古有道君子之行。非邪。且縣先生長於予二十許。雖不我學乎。其亦知我焉不爾。其

必固守所聞。不知世載文以遷。謂是我職也。而欲身自效之。父子相難。如向歆異見。必不爾也。蓋縣先生先獲我心者也。顧謙讓未遑。竚其子以發。不爾。士所獨見昭曠。二公不易。豈宵執射執御。不辭其卑。汝出我處。一左一右。各更其爲。以底其成。也是縣先生雖不我學乎。既先獲我心焉。假使微吾子之請。予何已乎。曩者次公居予塾中。三年乃歸。歸五年。值朝鮮聘使之來也。舟泊赤關。其人素稱嫋文學。於是海內學士。砥其藝。以求一相當。次公亦且往試之。則彼逡巡不敢當其鋒。由此次公名隆隆以起。諸海內學士莫

有不識其名者。久之。今侯益鄉文學。築宮其國中。以館國子。旣稟稱之。歲時祀先聖先師。惟肅。則國人翕然化之。蓋次公與有力焉。而諸受業次公者。若和某。田某。井某等數十人。彬彬然以興弦誦之聲。達諸四竟。假之數年。行將輶西京。比隆東都。何其盛也。縣先生實使之焉。夫士居則孰不云吾有志焉。方今海內無事。士大夫皆世祿世官。官無知愚。各守其成。故昇平百年。人無知愚。亦百年。所乏者人。而士職微秩卑。有志何能爲。萬一遭遇陳力就列。任使無人。拮据獨勞。亦將何能爲。是昇平之憂也。是以文王作人。仲尼

樂育英才。故曰。學校者治之本也。儒者之事也。以此觀之。吾黨士獲志能行於當世者。宜莫次公若也。縣先生其樂乎。傳曰。知者樂。仁者壽。縣先生者可謂兼之已。若夫世俗所稱道童顏鬚髮。健啖食。行步衍衍。男女畢婚嫁。日坐堂皇。含飴弄孫。娛其餘年。亦何足言哉。臨次公之行。乃賦詩八章以授之。俾誦於縣先生前。侑之酒。

翬彼頽宮。維侯經始。維斯髦士。師氏所肄。其一頽宮既落。金石有縣。青青者衿。威儀可選。其二于弦于歌。青青者衿。黃鳥來止。下上其音。其三瞻彼杏壇。有華

其翬青青者衿。時雍於變。其四青青者衿。鬱兮有作。維斯師氏。與侯偕樂。其五所樂維何。狂簡成章。濟濟多士。邦家之祥。其六其祥維何。鳳邪慶邪。等而下之。有偉彪如。其七維昔老彭。造士三千。師氏錫類。侯萬斯年。其八

